

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

Rješenje

**po Prijavi namjere koncentracije privrednog subjekta InBev S.A, Brisel, Kraljevina Belgija i
privrednog subjekta Anheuser – Bush Companis Inc, Missouri, Sjedinjene Američke Države**

Sarajevo
Oktobar 2008. godine



Broj: 01-01-26-034-11-II/08
Sarajevo, 22.10. 2008. godine

Na osnovu čl. 25. stav (1) tačka e) i 42. stav (1) tačka d), u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05 i 76/07), rješavajući po Prijavi namjere koncentracije privrednog subjekta InBev S.A., Grand Place 1, 1000 Brisel, Kraljevina Belgija, zastupanog po advokatu Stevanu Dimitrijeviću iz Banja Luke ul. Gundulićeva 4, zaprimljenoj dana 14. avgusta 2008. godine pod brojem: 01-01-26-034-II/08, Konkurencijsko vijeće, na 74. (sedamdesetčetvrtoj) sjednici održanoj dana 22.10.2008. godine, je donijelo

R J E Š E N J E

1. Ocjenjuje se dopuštenom koncentracija koja će nastati na tržištu piva u Bosni i Hercegovini pripajanjem privrednog subjekta „Anheuser – Busch Companies Inc“, One Busch Place, St. Louis, Missouri, MO 63118, Sjedinjene Američke Države privrednom subjektu InBev S.A., Grand Place 1, 1000 Brisel, Kraljevina Belgija kupovinom 100% dionica.
2. Radi nepodnošenja Prijave namjere koncentracije u zakonom predviđenom roku, privrednom subjektu InBev S.A., Grand Place 1, 1000 Brisel, Kraljevina Belgija, izriče se novčana kazna u visini od 100.000,00 KM, koju je obavezan platiti u vremenskom roku od 8 dana, od dana prijema ovoga Rješenja.
3. Ovo Rješenje o koncentraciji se upisuje u Registar koncentracija.
4. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 14.08.2008. godine zaprimilo pod brojem: 01-01-26-034-II/08, Prijavu namjere koncentracije poslatu poštom dana 12.08.2008. godine (u daljem tekstu: Prijava) privrednog subjekta InBev S.A., Grand Place 1, 1000 Brisel, Kraljevina Belgija, zastupanog po advokatu Stevanu Dimitrijeviću iz Banja Luke ul. Gundulićeva 4 (u daljem tekstu: Podnosilac prijave ili InBev), kojom namjerava, kupovinom 100% dionica, pripojiti privredni subjekt „Anheuser – Busch Companies Inc“, One Busch Place, St. Louis, Missouri, MO 63118, Sjedinjene Američke Države (u daljem tekstu: Anheuser).

Uvidom u dostavljenu Prijavu utvrđeno je da ista nije kompletna, te da je treba dopuniti u smislu člana 30. stav (1) Zakona o konkurenciji (u daljem tekstu: Zakon) i čl. 8., 9. i 10. Odluke o načinu podnošenja prijave i kriterijumima za ocjenu koncentracija privrednih subjekata („Službeni glasnik BiH“, broj 95/06), te je zatražena dopuna Prijave podneskom broj: 01-01-26-034-1-II/08 od 21.08.2008. godine.

Podnosilac prijave je izvršio dopunu Prijave potrebnom dokumentacijom podnescima broj: 01-01-26-034-2-II/08 od 04.09.2008. godine i broj: 01-01-26-034-3-II/08 od 08.09.2008. godine.

Zbog činjenice da Podnosilac prijave nije dostavio sve potrebne podatke, Konkurencijsko vijeće je uputilo zahtjev za dopunu Prijave podneskom broj: 01-01-26-034-4-II/08 od 11.08.2008. godine.

Podnosilac prijave je Prijavu dopunio podneskom zaprimljenim pod brojem: 01-01-26-034-5-II/08 od 16.09.2008. godine.

Slijedom navedenog, Konkurencijsko vijeće je Podnosiocu prijave izdalo Potvrdu, dana 29.09.2008. godine broj: 01-01-26-034-6-II/08, kojom potvrđuje podnesenu Prijavu urednom i kompletnom u smislu člana 30. stav (3) Zakona.

Podnosilac prijave je naveo, u smislu člana 30. stav (2) Zakona, da je podnio zahtjev za ocjenu koncentracije nadležnim tijelima za zaštitu konkurencije u Argentini, Brazilu, Kini, Njemačkoj, Meksiku, Crnoj Gori, Srbiji, Velikoj Britaniji, Urugvaju i SAD.

Predmetna Prijava nije podnesena blagovremeno, u smislu člana 16. stav (1) Zakona, u vremenskom roku od osam dana od zaključivanja Ugovora i Plana pripajanja zaključenog od strane i privrednog subjekta Anheuser – Busch Companies Inc, InBev i Pestalozzi Acquisition Corp., budući da je predmetni Ugovor zaključen dana 13.07.2008. godine.

1. Učesnici predmetne koncentracije

Učesnici predmetne koncentracije su privredni subjekt InBev S.A., Grand Place 1, 1000 Brisel, Kraljevina Belgija i privredni subjekt „Anheuser – Busch Companies Inc“, One Busch Place, St. Louis, Missouri, MO 63118, Sjedinjene Američke Države.

1.1. Privredni subjekt InBev S.A. Brisel, Kraljevina Belgija

Privredni subjekt InBev S.A. Inc (u daljem tekstu InBev) sa registrovanim sjedištem na adresi 1000 Brisel, Grand Place 1, , pod registarskim brojem BL478821 kod Agencije za privredne registre Brisela, matični broj 0417.497.106 je osnovan dana 02.08.1977. godine.

InBev je dioničko društvo sa vlasničkom strukturom prikazanom u Tabeli 1.

| Dioničari | Udio % |
|------------------|---------------------|
| Stichting AK | (..)** ¹ |
| EPS S.A. | (..)** |
| Ostali dioničari | (..)** |
| UKUPNO | 100,00 |

Izvor: Podaci iz Prijave

Registrovane djelatnosti privrednog subjekta InBev obuhvataju proizvodnju i prodaju piva, gaziranih pića i bezalkoholnih negaziranih napitaka.

Privredni subjekt InBev u Bosni i Hercegovini, kao subsidijarno društvo posjeduje privredni subjekt „Zagrebačka pivovara“ d.o.o. Posušje, Čitluk bb, Posušje, Bosna i Hercegovina, koji je u

¹ (..)**- podaci predstavljaju poslovnu tajnu

100% vlasništvu privrednog subjekta „Zagrebačka pivovara“ d.d. Zagreb, Ilica 224, Zagreb, Republika Hrvatska.

Privredni subjekt Zagrebačka pivovara d.o.o. Posušje, Čitluk bb, Posušje, Bosna i Hercegovina je upisan u sudski registar Općinskog suda u Širokom Brijegu pod registarskim brojem 1-4138. i bavi se samo proizvodnjom piva.

Privredni subjekt InBev je kontrolisani privredni subjekt od strane privrednog subjekta Stichting AK, Hofplein 20, 3032 AC Rotterdam, Kraljevina Holandija, koji posjeduje (..)**% vlasničkog udjela u istom.

Privredni subjekt Stichting AK je osnovan kao fondacija od strane privrednog subjekta Eugenie Patri Sebastien SA, društvo sa ograničenom odgovornošću sa sjedištem na adresi Rue Guillaume Kroll 5, L – 1882 Luksemburg (u daljem tekstu: EPS) i BRC SARL društvo sa ograničenom odgovornošću sa sjedištem na adresi Cote d'Eich 73L, L – 1450 Luksemburg.

Privredni subjekt Stichting AK osim privrednog subjekta „Zagrebačka pivovara“ d.o.o. Posušje, nema drugih povezanih privrednih subjekata u Bosni i Hercegovini.

1.2. Privredni subjekt Anheuser – Busch Companies Inc.

Dioničko društvo Anheuser – Busch Companies Inc. (u daljem tekstu: Anheuser) sa registrovanim sjedištem na adresi One Busch Place, St. Lois, MO 63118, SAD je osnovano dana 21.02.1979. godine.

Registrovane djelatnosti privrednog subjekta Anheuser su proizvodnja i prodaja piva i drugih bezalkoholnih pića (energetskih napitaka i aromatizovane vode), proizvodnja aluminijskih limenki za pića i upravljanje tematskim parkovima u SAD. Također se bavi proizvodnjom slada, upravljanjem nekretninama, poljoprivredom, štampanjem etiketa na metalu i papiru, proizvodnjom flaša i transportnim uslugama.

Privredni subjekt Anheuser je matično društvo grupe društava, a njegova zavisna društva uključuju Anheuser – Busch Inc, proizvođača piva u SAD, zatim Anheuser – Busch – International Inc, holding društvo za međunarodne poslove, Busch Entertainment koje upravlja tematskim parkovima i Metal Container Corporation koje proizvodi limenke.

Privredni subjekt Anheuser nema povezanih privrednih subjekata u Bosni i Hercegovini.

2. Obaveza prijave namjere predmetne koncentracije

Ukupni godišnji prihodi privrednih subjekata učesnika predmetne koncentracije na dan 31.12.2007. godine prikazan je u Tabeli 2:

Tabela 2

| | InBev | Anheuser |
|----------------------------|--------------|-----------------|
| | (KM) | (KM) |
| Svijet | (..)** | (..)** |
| Bosna i Hercegovina | (..)** | / |

Izvor: Podaci iz Prijave

Na osnovu ostvarenog godišnjeg prihoda učesnika koncentracije na dan 31.12.2007. godine proizašla je obaveza podnošenja prijave namjere koncentracije, u smislu člana 14. stav (1) Zakona.

3. Pravni osnov i oblik koncentracije

Pravni osnov koncentracije je Ugovor i Plan pripajanja zaključen između Anheuser – Busch Companies Inc, InBev i Pestalozzi Acquisition Corp. dana 13. jula 2008. godine.

U skladu sa navedenim Ugovorom i Planom pripajanja privredni subjekt InBev namjerava da pripoji privredni subjekt Anheuser kupovinom 100 % dionica.

Na osnovu naprijed navedenog pravni oblik predmetne koncentracije, predstavlja pripajanje privrednog subjekta Anheuser privrednom subjektu InBev, u smislu člana 12 stav (1) tačka a) Zakona o konkurenciji.

4. Relevantno tržište predmetne koncentracije

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvaća sve proizvode i/ili usluge za koje potrošači smatraju da su međusobno zamjenjive s obzirom na njihove bitne karakteristike, kvalitet, namjenu, cijenu ili način upotrebe.

Nadalje, prema članu 5. Odluke o utvrđivanju relevantnog tržišta relevantno tržište u geografskom smislu obuhvaća cijelu ili dio teritorije Bosne i Hercegovine, na kojoj tržišni konkurenti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Relevantno tržište proizvoda predmetne koncentracije je tržište piva.

Relevantnim geografskim tržištem smatra se tržište Bosne i Hercegovine.

U skladu sa navedenim Konkurencijsko vijeće je odredilo da se pod relevantnim tržištem smatra tržište piva na cijeloj teritoriji Bosne i Hercegovine.

5. Analiza relevantnog tržišta predmetne koncentracije u Bosni i Hercegovini

Podnosilac Prijave je u Prijavi dostavio podatke o tržišnom udjelu učesnika koncentracije na relevantnom tržištu i tržišne udjele njihovih glavnih tržišnih konkurenata.

Tržišni udjeli učesnika koncentracije i njihovih glavnih konkurenata na tržištu piva prikazani su u Tabeli 3.

Tabela 3.

| R.b. | Privredni subjekt | Tržišni udio % |
|-------------|--|-----------------------|
| 1. | Sarajevska pivara, BiH | 20,00 |
| 2. | Carlsberg, SR Njemačka | 11,00 |
| 3. | Heineken, Holandija | 11,00 |
| 4. | Banjalučka pivara, BiH | 10,00 |
| 5. | InBev (Zagrebačka pivovara), Posušje, BiH | 5,00 |
| 6. | Bihaćka pivara, BiH | 5,00 |
| 7. | Ostali | 38,00 |
| | Ukupno | 100,00 |

Izvor: Podaci iz Prijave

Prema podacima koji su navedeni u Tabeli 4. proizilazi da na tržištu prodaje najveći tržišni udio ima privredni subjekt Sarajevska pivara od 20,00%, dok privredni subjekt InBev putem privrednog subjekta Zagrebačke pivovare d.d. Posušje ima 5,00% .

Privredni subjekt Anheuser, kao učesnik u predmetnoj koncentraciji ne ostvaruje udio na relevantnom tržištu proizvodnje i prodaje piva u Bosni i Hercegovini s obzirom da svojim registrovanim poslovanjem nije prisutan na istom.

6. Ocjena predmetne koncentracije

Konkurencijsko vijeće je, nakon procjene i analize podataka i utvrđenih činjenica u smislu člana 17. Zakona, u postupku donošenja predmetnog Rješenja, ocijenilo da provođenje predmetne koncentracije neće narušiti postojeću tržišnu konkurenciju s obzirom da privredni subjekt Anheuser nije prisutan na tržištu proizvodnje i prodaje piva u Bosni i Hercegovini, te da predmetna koncentracija vodi samo promjeni vlasničke strukture između učesnika koncentracije iz čega proizilazi da navedena koncentracija neće proizvesti promjenu tržišnog udjela na relevantnom tržištu.

Konkurencijsko vijeće je utvrdilo da se predmetnom koncentracijom privrednih subjekata ne stvara i ne jača dominantan položaj na relevantnom tržištu, te je odlučilo kao u dispozitivu ovog Rješenja.

Uzimajući u obzir sve navedene činjenice i podatke koji su prethodili donošenju odluke, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) pod a) Zakona, kao što je odlučeno u dispozitivu ovog Rješenja.

7. Novčana kazna

Prema članu 16. stav (1) Zakona obaveza podnošenja prijave namjere koncentracije je u vremenskom roku od 8 dana od dana zaključivanja sporazuma /ugovora.

Konkurencijsko vijeće je utvrdilo da je predmetna Prijava poslata poštom dana 12. avgusta 2008. godine sa zakašnjenjem od 22 dana. Učesnici koncentracije su bili dužni podnijeti predmetnu Prijavu najkasnije dana 21. jula 2008. godine odnosno osam dana od dana zaključivanja Ugovora i Plana pripajanja, kao pravnog osnova predmetne koncentracije, potpisanog dana 13. jula 2008. godine.

Odredbom člana 49. stav (1) tačka b) Zakona, Konkurencijsko vijeće može privrednom subjektu izreći novčanu kaznu do 1,0% ukupnog prihoda ako ne podnese prijavu namjere koncentracije, u smislu člana 16. stav (1) Zakona.

Prema navedenom Konkurencijsko vijeće je podnosiocima Prijave izreklo novčanu kaznu od 100.000,00 KM, u skladu s članom 49. stav (1) tačka b) Zakona a u vezi utvrđenog kršenja člana 16. stav (1) Zakona.

Također, Konkurencijsko vijeće je pri utvrđivanju visine novčane kazne imalo u vidu i činjenicu da Podnosilac prijave djeluju u zemljama u kojima je razvijena konkurencijska praksa i da se radi o velikoj kompaniji koja djeluje u velikom broju zemalja Evrope te je radi toga Podnosilac prijave trebao biti upoznat s propisima zemlje u kojoj ima povezane privredne subjekte, preko kojih predmetna koncentracija ima uticaj na tržište u Bosni i Hercegovini.

8. Administrativna taksa

Podnosilac prijave na ovo Rješenje, u skladu s članom 2. stav (1) tarifni broj 107. tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06) je dužan platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

9. Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Ibrica Lakišić